

## KABAKTIANG MINGGU KAAMPA

### SIAP-SIAP

- Jamaat balajar lagu-lagu
- Sombayang di konsistori
- Majalis baca barita jamaat

### A. DATANG PAR TUHAN

Kampinjang<sup>1</sup> babunyi tiga kali, jamaat badiri la manyanyi lagu maso. Waktu jamaat manyanyi, orang-orang yang pung tugas dalang ibada (*majalis yang pung tugas, pandita, majalis jamaat yang laeng, orang yang baca Alkitab, deng kolektan*) maso ka tampa ibada.

#### 01. TUHAN ADA DENG KATONG DENG BILANG TABEA<sup>2</sup>

- Pdt<sup>3</sup> : Basudara jamaat samua! Ibada yang katong biking ni akang jadi deng nama Allah yang biking langit deng dunya.  
J : Amin  
Pdt : Yesus Kristus yang su tabus katong pung dosa deng yang kasi salamat katong.  
J : Amin  
Pdt : Tuhan pung Roh yang biking katong pung hidop jadi baru deng yang biking katong hidop tarus-tarus deng Allah.  
J : Amin  
Pdt : Allah kasi dame par jamaat salalu.  
J : (*Manyanyi lagu "Tete Manis Pung Sayang Yang Basar"* [1 = c 1 ketuk])

0 3 3 3 3 3 . 3 3 1 2 3 4 .  
Te - te - ma- nis pung sa-yang yang ba-sar  
0 1 1 2 3 3 . 3 2 1 1 6 .  
sa - la - lu ting-gal deng a - le la - i

0 6 5 6 . ||  
A - min

#### 02. NATS ALKITAB YANG JADI DASAR DALANG KABAKTIANG NI (....)

#### 03. JAMAAT MANYANYI

(Abis manyanyi, jamaat langsung dudu)

#### 04. MANGAKU DOSA

- Pnt : Sio Tuhan... Sio Allah yang katong somba e... Katong mangaku kalo dalang katong pung hidop sabang hari, katong jaga biking apa yang Bapa seng mau.  
J : Katong jaga pake katong pung pikirang par biking rencana jahat, bukang rencana bae.  
Pnt : Katong jaga kasi kaluar kata yang biking orang laeng pung hati luka, bukang kata-kata yang kasi kuat dong.  
J : Katong jaga biking apa yang bisa biking cilaka orang laeng, bukang yang bisa biking dong salamat.  
Pnt+J : (*Manyanyi*)<sup>4</sup>

||: 3 5 6 1 6 5 3 3 . . :||  
1. Ba - pa am-pong be-ta ju - a  
2. Kris-tus am-pong be-ta ju - a

- Pnt : Katong jaga biking rusak tana, aer, deng udara di katong pung negri ni, bukang

<sup>1</sup> Kampinjang ni lonceng gareja.

<sup>2</sup> *Tabea* ni pung arti sama deng "kalwedo" ka "kidabela". Bisa juga bilang "Pagi bae" ka "Malang bae".

<sup>3</sup> Bisa pandita, penatua, ka sapa sa yang pimping ibada.

<sup>4</sup> Bisa ganti deng lagu laeng yang bicara soal hal yang sama.

- J : kalesang akang bae-bae.
- J : Sio Tuhan Allah e! Ampong katong pung sala deng dosa jua. Roba katong pung roh deng hati jadi baru jua, biar katong pung pikirang, kata-kata, deng samua yang katong biking bisa jadi labe bae lai. Deng biar dari apa yang katong biking, akang bisa bawa hasil yang labe bae par tana, aer, udara, deng samua-samua yang Bapa biking di dunya ni.
- Pnt : Katong minta samua tu deng nama Tuhan Yesus yang katong somba.
- Pnt+J : Amin.

#### 05. JAMAAT MANYANYI

#### 06. ALLAH KASI AMPONG KATONG PUNG DOSA

Pdt : Basudara jamaat yang Tuhan sayang! Sapa sa yang su mangaku dia pung dosa, Allah su kasi ampong dia. Antua bilang bagini, "Biar kata kamong pung dosa-dosa mera macang deng dara lai, Beta nanti kasi barsi akang sampe puti macang deng santang pukat. Biar kata kamong pung dosa-dosa mera macang deng kasumba lai, Beta nanti kasi barsi akang sampe puti macang deng kapas." (Yesaya 1:18)

#### 07. JAMAAT MANYANYI

#### 08. HIDOP IKO TUHAN PUNG MAU

(Langsung badiri)

- Pdt : Basudara yang beta sayang! Mari katong samua baku sayang satu deng laeng tarus. Barang, Allah sandiri su sayang katong labe kamuka deng su utus Antua pung Ana par datang tabus katong pung dosa-dosa, biar katong bisa baku bae deng Antua. (1 Yohannis 4:7, 10-11, 19)
- J : Manyanyi

(Abis manyanyi langsung dudu)

### B. BACA DENG DENGAR ALLAH PUNG AJARANG

#### 09. SOMBAYANG MINTA TUHAN PUNG ROH TOLONG: (Penatua yang pung tugas. Sombayang deng cara manyanyi lagu "Datanglah ya Roh Kudus" ka lagu laeng yang sama.)

||: 1 1 1 | 1 1 1 | 3 3 3 4 | 3 2 2 |

Da-tang-lah da-tang-lah da-tang-lah ya Roh Ku-dus

6 1 . 1 | 1 0 :|| 6 3 2 . 1 | 1 0 |

Oh da - tang-lah Oh da - tang-lah

5. | 6 5 6 1 | 1 . | 6 5 6 5 | 5. | 0 5 1 1 | 6 5 6 |

Oh da - tang-lah ya Roh Ku - dus ro-ba ka-tong pung

5 3 2 | 1. | 6 1 . 1 | 1. | 1 0 |

ha - ti ya Roh Ku - dus.

||: 1 1 1 | 1 1 1 | 3 3 3 4 | 3 2 2 |

Da- tang-lah da- tang-lah da-tang-lah ya Roh Ku-dus

6 1 . 1 | 1 0 :|| 6 3 2 . 1 | 1 0 ||

Oh da-tang-lah Oh da - tang-lah

#### 10. BACA ALKITAB : (Baca baku balas)

#### 11. MANYANYI DENG HATI SANANG TAGAL SU DENGAR ALLAH PUNG KATA-KATA :



- a. Haleluya, Haleluya, Haleluya (*Par Minggu Biasa, Tuhan Yesus Hidop Kombali, Tuhan Yesus Nai ka Sorga, Tuhan pung Roh Turung, deng Kajadiang*)
- b. Hosiana, Hosiana, Hosiana (*Par Minggu Sangsara*)
- c. Maranata, Maranata, Maranata (*Par Minggu Adventus*)

## 12. RIWAYAT

*13. DUDU TADO LA INGA-INGA RIWAYAT (Waktu itu, ada orang yang langsung barmaeng lagu satu pake orjen ka suling ka alat musik laeng barang satu menit)*

## 14. JAMAAT MANYANYI

### C. JAMAAT PUNG JAWABANG

#### 15. MANGAKU KATONG PUNG PARCAYA

*(Langsung badiri)*

Pdt+J : (*Mangaku "Katong pung Parcaya"*)

Beta parcaya par Allah Bapa  
yang pung kuasa par samua-samua yang ada.  
Antua yang biking langit deng dunya ni.

Beta parcaya par Yesus Kristus,  
Allah pung Ana satu areng-areng,  
yang jadi katong pung Raja.

Antua ada dalang Maria pung poro tagal Allah pung Roh,  
la lahir ka dunya biar kata Maria ni masih parawang.

Antua dapa siksa waktu Pontius Pilatus pegang parenta.  
Antua dapa salib, mati, la dapa kubur.  
Antua turung ka orang mati pung dunya,  
la hidop kombali pas akang pung lusa.

Antua nai ka sorga,  
dudu di Allah pung sabala kanang,  
la pegang parenta sama-sama deng Antua  
yang pung kuasa par samua yang ada.

Antua nanti datang dari sana  
par jadi hakim par samua orang  
yang masih hidop deng yang su mati.

Beta parcaya par Allah pung Roh.

Beta parcaya kalo Allah su pili katong  
par jadi Yesus pung orang-orang  
yang taika jadi satu di antero dunya ni,  
deng sama-sama tarima apa yang bae dari Antua.

Beta parcaya kalo Antua kasi ampong katong pung dosa-dosa  
deng nanti kasi hidop katong pung badang kombali,  
la katong hidop tarus-tarus deng Antua.

Amin.

*(Langsung dudu)*

## 16. MANYANYI PUJI TUHAN : KOOR/VG/TRIO/SOLO/KA YANG LAENG

## **17. TANDA JAMAAT MINTA DANGKE**

- a. Nasehat :  
Dkn : Basudara jamaat e! Tuhan su kasi berkat banya dalang katong pung hidop ni. Tagal itu, mari katong minta dangke dari Antua deng cara kasi apa yang katong su tarima dari Antua tu. Tuhan kasi berkat par katong.
- b. Waktu kasi samua tu, jamaat manyanyi lagu ...
- c. Sombayang sama-sama par apa yang jamaat su kasi :

*(Badiri)*

Samua:

Sio Allah Bapa e! Samua yang katong tarima ni, akang asal dari Bapa.  
Samua yang katong harap tu, akang bisa jadi tagal Kristus pung sayang.  
Samua yang katong dapa tu tagal Tuhan pung Roh pimping katong.  
Tagal itu, tolong kasi kuat katong par sayang samua orang deng tolong katong  
par kalesang samua yang Bapa biking. Amin.

## **18. MANYANYI PUJI TUHAN : KOOR/VG/TRIO/SOLO/KA YANG LAENG**

### **19. SOMBAYANG PAR GAREJA DENG DUNYA**

*(Yang sombayang tu pandita, bapa satu, mama satu, deng ana satu)*

### **D. ALLAH UTUS JAMAAT DENG JANJI PAR ADA SAMA-SAMA DENG KATONG**

#### **20. JAMAAT MANYANYI**

*(Langsung badiri)*

#### **21. ALLAH UTUS JAMAAT DENG JANJI PAR ADA SAMA-SAMA DENG KATONG**

- Pdt : Basudara jamaat e! Mari pulang deng hati sanang la biking basudara dong pung karja bae-bae, tagal lewat samua tu katong puji Tuhan. Jadi, mari dengar Tuhan pung janji:  
*“Tuhan Yesus Kristus kasi unju Antua pung hati bae deng kasi dame par basudara jamaat samua.”*
- J : *(Manyanyi)*
- 3 3 3 2 13 21 5 . . ||  
A-min, a-min, a ----- min.

----- **Dudu tado la minta dangke dari Allah** -----

*(Jamaat tolong jang kaluar kamuka pandita deng majalis dong. Pandita deng majalis-majalis bajalang kaluar la badiri di muka pintu. Tarus pandita deng majalis-majalis pegang tangang deng jamaat, bagitu lai jamaat deng jamaat. Waktu dong samua ada pegang tangang, kantoria manyanyi ka majalis yang pung tugas pimping lagu.)*